

## EKSTERS



In jannewaori kriegen eksters de kriebels in et bloed. Ie heuren ze schetteren, tekeergaon en ruzie maekcn. De mannegies doen heur

uterste best om een partner te vienen. Een peer daegen laeter bekikt een peertien een nust van et veurige jaor. Hiel vaeke wodt zoe'n nust opni'j bewoond.

De ekster blijft winters op et plak daor hi'j et oflopen jaor bruded het. Jonge voegels zwarven in de wintertied omme. As et slim koold is ziej' hiele groepen bi'j mekeer; dat het veur een diel te maeken mit et gebruik van slaopplakcn. Op zoe'n slaopplak kun heur wel vuuffig tot honderd eksters verzaemelen.

Ie zien de ekster veural in gebieden mit hogere bomen. Ze bin et meerste te vienen in laandbouwstreken. Dat het te maeken mit et anbod van eten, mar ie zien de voegel ok de hielten meer in dörpen.

Veul meensken kun weinig wardering veur de ekster opbrengen vanwege zien eetgewoonten. In de tied van et bruden, en veural as eksters jongen hebben, wo'n veul jongen van verschillende soorten zangvoegels uut de nusten haeld.

De ofkeer van de ekster is niet ni'j. Vroeger wodde hi'j een dief nuumd. Dat komt omdat de ekster gek is op glimmende veurwarpen. Spiekers, lepels, vörken, glas, blinkende sierraoden en zulverpepier pikt hi'j mit as hi'j de kaans krigt.

De ekster is een prachtige voegel. As hi'j noffelik in et zunnegien zit, vaalt hi'j op deur de paorse, rooie en blauwe weerschien van de zwatte stat- en vleugelveren. Et is een schraandere, opgeruumde en luudruchtige voegel. Mar over zien doen en laoten wodt.verschillend docht!